

Ambasador Schaller: Za zapošljavanje osoba s invaliditetom 27 miliona KM iz Švicarske

<http://www.bh-index.com/ambasador-schaller-za-zaposljavanje-osoba-s-invaliditetom-27-miliona-km-iz-svicarske/>

Datum objave: 11.feb.14. - 13:40
Autor: L.B.



Predstavnici Fondacije za socijalno uključivanje u Bosni i Hercegovini danas su u Sarajevu prezentirali publikaciju "Mi smo tu" koja predstavlja analizu stanja svih osoba s invaliditetom i mogućnosti njihovog zapošljavanja i samozapošljavanja.

Publikacija, također daje i preporuke za mogućnost zapošljavanja osoba s invaliditetom, analizira raskorak između normativnog i stvarnog te specifičnost rješavanja tog problema i pronalaženja sistemskih rješenja na entitetskim i državnom nivou.

Direktorica Fondacije Ranka Ninković-Papić je kazala da je analiza nastavak aktivnosti Fondacije u radu s osobama s invaliditetom. Pojasnila je da su analizu izradili stručnjaci iz vladinog i nevladinog sektora.

- Nadamo se da će analiza, presjek stanja osoba s invaliditetom dati konkretne rezultate te situaciju promijeniti nabolje – kazala je Ninković-Papić.

Podsjetila je da osobe s invaliditetom čine deset posto populacije BiH te da su najugroženija kategorija bez obzira na brojne usvojene konvencije i strategije.

- Oko dvije trećine osoba s invaliditetom je blizu ili ispod linije siromaštva – dodala je.

Dio sredstava za izradu analize dala je Ambasada Švicarske u BiH, a ambasador Andre Schaller je kazao da Švicarska podržava sve projekte i smatra ih važnim koji se bave uključivanjem osoba s invaliditetom u zapošljavanje.

- U okviru saradnje s BiH švicarska ambasada je rezervisala 27 miliona KM, za projekte zapošljavanja osoba s invaliditetom – istaknuo je Schaller te dodao da je jedan od tih projekata i pomoć Fondaciji.

Dobrica Jonjić, pomoćnik ministra Federalnog ministarstva rada i socijalne politike i autor dijela publikacije, naglasio je da je zapošljavanje ključni segment kako zdravih osoba, tako i osoba s invaliditetom.

Podsjetio je da federalna vlast u proteklih nekoliko godina provodi značajne aktivnosti kad su u pitanju osobe s invaliditetom.

- U protekle tri godine u primjeni je Zakon o profesionalnoj rehabilitaciji, osposobljavanju i zapošljavanju osoba s invaliditetom koji, po mom mišljenju, daje skromne, ali stabilne rezultate – istaknuo je Jonjić te dodao da je u Federaciji BiH u protekle dvije godine putem javnih konkursa zaposleno više od 300 osoba s invaliditetom.

Jonjić je naglasio i da je najvažnije raditi na podizanju svijesti kod ljudi, u suprotnom donošenje zakona i podzakona nema značajne efekte.